

Date – 18/08/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Aizawl Municipal area-a card en that mek chu mipui hmuh theih turin veng tinah tarchhuah a ni dawn tih ZPM Adviser Pu B. Lalchhanzova'n a sawi.
2. Serchhip YMA Sub Hqrs. hnuaia Anti-Drug squad leh branch YMA hruaitu thenkhatten ruihhlo kaihnawih man chângâa thuhretua tan buaithlak an tih thu an sawi.
3. Ruahsur nasa vanga Lunglei leh Tlabung inkar, NH 302 kawngpui a chhiat avangin Tlabung leh Lunglei inkara tlan Maxi Cab te an chawl lailawk.

<><><>

SUPPLY MINISTER

ZPM Adviser Pu B. Lalchhanzova'n nimin khan Aizawl Edentharr vengâa Basic Service to Urban Poor (BSUP) a awmte tlawhin BSUP-a cheng mek thenkhat NFSA (Ration Card Eng emaw a Pawl emaw nei ngei tur, nei si lo te a tlawh a. BSUP-a cheng zingâa Card var nei an lo la awm chu sawrkar hmalakna tur a ni, tiin miretheite chanvo buhfai, man lova semte mirethei awmkhawmna BSUP-a awmte zingah chang ve lo an awm chu ram tan thil zahthlak tak a ni, a ti.

BSUP-a cheng ten hmun hla tak taka ration an khul thin pawh an kawtkai ngeia ration an khul theih nan hma an lak tur thu Pu B. Lalchhanzova chuan a sawi a. Card Eng leh Card Pawl nei lo tur nei mek si te, Pathian malsawmna dawnga dinhmun thaa ding te card vara thiar chhuak turin hmalak mek a ni, a ti a. Aizawl Municipal area-a card en that mek chu mipui hmuh theih turin veng tinah tarchhuah a ni ang a, complaint duhte tan complaint theih hun hawn a ni ang, a ti bawk.

<><><>

AMC

Aizawl Municipal Corporation (AMC) hnuaiah kum 2018 atanga kumin thlengin In sak license dil 15,681 an awm a, 14,236-te dilna chu pawm a ni a, 86 hnawl a ni.

AMC hotute sawi danin, In sak dilna hnawlsakte hi 'drawing' dik theih loh vang te, ram inthuah vangte leh mahni inhnukdawk te an ni a. In sak license dil 1,331 te chu uluk taka enfiah mek an nih thu an sawi bawk.

Hei bakah hian AMC hotute chuan kumin hian dawr kai license dil mi 2,130 an awm thu an sawi a, license renew 1471 awmin an vaiin 3,601 an ni.

<><><>

SERCHHIP

Serchhip YMA Sub Hqrs. hnuaiia Anti-Drug squad leh branch YMA hruaitu thenkhatten ruihhlo kaihnawih man chângá thuhretua tan buaithlak an tih thu an sawi.

Hemi chungchang hi nimina Sub-Hqrs executive thutkhawm, an President Pu Kawlthuaama kaihhruaiah an ngaihtuah a. Excise Enforcement leh Police ten ruihhlo zuar te an manin hriatpuitu an ni thin a. Thubuai hi Dist. & Session Judge awmna Aizawlah ngaihtuah a ngai thin a. A kal man an dawn tur an dawn theih mai thin loh avangin witness-a tan reng a harsat tak thu an sawi a. Chief Minister leh Law Minister hnenah emaw Court lam thuneitute hnenah emaw sawi ni se, pawisa hi tun ang rengá dawn a harsa a nih chuan la ngaihtuah nawn leh ni se, an ti.

Hei bakah hian Mizoram Gorkha ten OBC status an beisei mekah Central YMA hmalakna an thlawp tlat thu pawh an sawi a. YMA Rorel inkhawmpui agenda tur an sawiho zingah ruihhlo do kawnga chak zawka hmalak rawtna te, VC term kum 5 chu kum 3-a titawi tura hmalak rawtna te, Fa nei tam tura hmalak rawtna leh NHIDCL te kawng siam chhe lutuk siamtha leh tura nawr zui rawtna te a tel a. Raltlante khuahkhirh dan tur leh tui-hna humhalh kawnga hma lak dan tur an duang bawk.

<><><>

LUNGLEI

Ruahsur nasa vanga Lunglei leh Tlabung inkar, NH 302 kawngpui a chhiat avangin Tlabung leh Lunglei inkara tlan Maxi Cab te an chawl lailawk.

Hetihlai hian Lunglei leh Lungsen khaw inkara tlan Sumo ho pawh chawlh tur tih awm lo mah se kawng chhiat avangin tlan lo leh chawl an awm nual. Thu dawnnain a tarlan dan chuan kawng chhiat zualna hi Hauruang leh Phairuangkai khaw inkar a ni.

Tun dinhmunah kawng chhiat avangin Maxi cab te chawl mah se ei leh barah harsatna lutuk erawh thleng a la awm rih lo.

(Thanghmingliana Renthlei, Lunglei PTC)

<><><>

HOME MINISTER

Home Minister Pu K. Sapdangan Hnahthiala Police SP leh Fire hmunhmate nimin khan enfiahin leiminna hmun leh bawhlawh paihna hmun te a enfiah nghal bawk. Minister hi Hnahthial bialtu MLA Pu Jeje Lalpekhlua'n a tawiawm.

Home Minister hian Police leh Fire ram te a tlawh hnuin Saithah kawnga bawhlawh paihna leh KVK Farm kawnga Hnahthial bawhlawh paihna hmunhmate chu thli-thlaiin felfai zawka bawhlawh tih riral a nih theih dan tur bakah mipui tana hnawksak lo leh ram leilung tana pawl lo tura bawhlawh paih dan turte a hmunah official-te nen an enho bawk a. Hemi hnu hian leiminna hmun hrang hrang a tlawh a ni.

<><><>

KUHVA SMUGGLING

Tuipui Junction leh North Khawbung inkar kawngah dan lova kuhva tawlh ruk trip 17 chu ASI Pu C. Lalremkima, Khawzawl Police Station leh a team ten

nimin khan an man a, kuhva rah man zawng zawng hi bag 503 niin Cheng vbch 1 leh Nuai 16 man vel a ni.

Kan corr thudawn danin, heng kuhva man te hi Khawzawl Deputy Commissioner, Pu K. Vanlalhiana leh Khawzawl Superintendent of Police, Pu Lalchhuanthanga ten enfiahin hmalak dan turte sawiho a ni a, Khawzawl Police Station-ah chhui zui tura dah lailawkin, District Magistrate hnenah thawn tum a ni.

<><><>

BLOOD DONATION

Mizoram Gorkha Youth Association (Central)chuan an pawl din champha pualin nimin khan Aizawl Gorkha School Complex-ah Thisen Pek Runpui an buatsaih a, Gorkha thalai mi 87-in thisen an pe.

MGYA hian kum tin August thlaah Thisen Pek Runpui an buatsaih thin a, an buatsaih chhan hi Mizoram tana an pawl din hriatreng nan an ti thin tih MGYA hrulaitu pakhat chuan a sawi.

Champhai Health & Sanitation Sub-Committee hmalaknain nimin khan Hnahlan leh a chhehvela Branch hrang hrang YMA Member te pawhin Champhai District Hospital-a dam lo leh a mamawh apiangte hman turin Hnahlan Community Hall-ah thisen an pe baw a. He hunah hian mi 115-in thisen an pe a, thisen petute hi mipa 113 leh hmeichhia 2 an ni a, Champhai Sub-Hqrs.YMA hnuai ni khat thil thua thisen pek tam ber tum a ni.

<><><>

ADVISER TO CM

Adviser to CM Pu H. Ginzalala, Champhai North bialtu MLA hovin nimin khan Champhai District leh Champhai North Assembly Constituency huam chhunga hmasawna ruhrel din tumna hmun te en a ni a. Champhai Bawrhsap Pu VL Remliana, Khawzawl Bawrhsap Pu Vanlalhiana, sawrkar department aiawhte leh khawtlang hrulaitute an tel.

He hunah hian Champhai Khankawn Police Checkgate bula Soil Bank siamna tur leh NH-06 Tuipui leh Tuimuk inkara Center of Excellence Recreational Center, Cold Storage leh bazar changtlung tak awm kawp theihna tur hmunhma te enfiah a ni.

Pu Ginzalala chuan ram leilung tichhe tlem zawnga hmasawna hna kalpui a pawimawh thu sawiin, hna tak tak thawh tan hmain Soil Bank mumal tak ruahman lawk a tul a ni, a ti a. Khankawn Police Check-Gate bul ruam dawl zawl a nih chuan Champhai khawpuiin kawtchhuah nuam zawk a nei anga mipui mai bakah dan leh thupek kengkawhtute tan pawh awlsamna a thlen dawn a ni, a ti. Adviser to CM hian Champhai khawpui veta Circular Ring-Road siam a nih hunah Khankawn Soil Bank chu tangkai taka hman theih a beisei thu a sawi baw.

NH-06 Tuimuk leh Tuipui inkar, Neihdawn ram chhunga Center of Excellence Recreational Center, Cold Storage leh bazar changtlung tak din tumna hmun pawh enfiah a ni a. Neihdawn khua atanga NH-06 pawh tur Link Road laiha kuthnawhtute inphochhuahna tur leh khualzinte tlawh chhenfakawm tak hmunhma din tumin ruahmanna siam mek a nih thu a sawi.

<><><>

TELENGANA

Telangana State Industries Minister D. Sridhar Babu chuan niman Industrial Policy thar leh MSMEs Policy thar chhuah thui a nih tur thu a sawi. Hyderabad-a media conference-ah thu a sawi a, policy thar siam tumte chu investor-leh industry-te tana tha tur a nih thu a sawi. Sorkar hmasain industry tana tanpuina a pekte chu state sorkarin chhonzawm a tum tlat thu a sawi. Sorkar hmasa policy zawng zawng, mipui mamawh zawng zawngte chu vawng rengin, eizawna leh thiamna lam ngaihtuah chungin thil thar bultan belh a nih tur thu a sawi bawk.

<><><>